

# La pagaglia bein meritada

Il venderdis suentermezdi ha il Center da formaziun Surselva surdau diploms

DA HANS HUONDER / ANR

■ **Suenter treis, respectivamein quater onns da scolaziun e per part da praticum han 53 absolventas ed absolvents da differentas partiziun dil Center da formaziun Surselva obteniu il venderdis lur diploms. El rom dalla fiasta ha il CEO dil Spital regional Surselva, Urs Kellenberger, fatg entgins patratgs davart la professiun, las finamiras e la tenuta da lavur.**

Il menader da partiziun dil Center da formaziun Surselva, *Marcus Beer*, ha envidau las absolventas ed ils absolvents dalla scola professiunala commerciala, la scola media mercantila, la scola media propedeutica e la scola mercantila dil di alla diplomaziun. En siu plaid da beinvegni ha el sutlingiau il grond engaschament dallas scolaras e dils scolaras duront quei temps: «Igl ei stau bi d'astgar accompagnar els ella veta professiunala. Ussa restan il plascher e la luschezza. Lur success ei era in success per la scola.»

## 98,2 perschien han reussiu

Otg scolaras ni scolaras, pia varga 15 pertschien, han contonschiu als examens finals ina nota da 5,3 e pli ault ed aschia ina nota da rang. Scolastas e scolaras da classa han saviu surdar 42 attestats federals da qualificaziun ad absolventas ed absolvents dalla scola professiunala commerciala (14 profil E, 7 profil M e 12 vendiderAs e 9 HMS niev), 18 attestats da maturitad professiunala (7 profil M, 2 HMS vegl, 9 HMS niev), treis attestats da notas finalas dalla formaziun da scola (scola media mercantila), tschun diploms dalla scola media propedeutica ed in diplom dalla maturitad specialisada sin sanadad. Da 54 candidatas e candidats ch'ei sepresentai als examens finals han 53 reussiu. Quei munta ina quota da success da 98,2 pertschien. La fiasta da diplom ei vegnida embellida d'ina gruppa da cant e musica ad hoc dalla scola.

## Excellentas notas

Cun la nota finala da 5,7 ha *Anja Furger* da Cumbel (scola media mercantila



Las absolventas ed ils absolvents el rang. Da seniester *Selina Meuli*, *Chiara Janka*, *Daria Flury*, *Flavia Tiri*, *Gianfranco Soller*, *Tobias Schär*, *Marlen Herger* ed *Anja Furger*.

FOTO H. HUONDER

suenter il praticum) contonschiu il meglier resultat dalla scola. Suenter haver terminau la part dalla formaziun dalla scolaziun ha ella absolviu il praticum tiel Departament federal per fatgs digl'exteriur a Berna. *Anja Furger* ha contonschiu aschbein ella part dalla formaziun sco era ella part pratica dalla scolaziun grondiusas notas. Era notas da rang han contonschiu el profil M cun 5,3 *Daria Flury* e *Tobias Schär*, tiels vendiders cun ina nota da 5,4 *Flavia Tiri*. Plinavon cun ina nota da 5,3 per la part formaziun dalla scola media mercantila *Chiara Janka* e per l'entira scolaziun dalla scola media mercantila ed ina nota da 5,3 *Gianfranco Soller*. Ella scola media propedeutica cun ina nota da 5,3 ei quei stau *Selina Meuli* e cun ina nota da 5,4 *Marlen Herger* ella maturitad dil fatg da sanadad.

## Interess e plascher

Il plaid festiv ha il CEO dil Spital regional Surselva a Glion, *Urs Kellenberger*, teniu. Surbiars onns ha el accompignau giuvenils. Differentas funcziuns ord siu cuors dalla veta sco per exempel expert d'examen, commember dil cussegl dallas scolaras aultas, commember da supranstanz dad ina scola da musica e president dall'organiziun dil mund da lavur da sanadad e socialessen en Turgovia demuossan siu grond engaschi en favur dils giuvenils. El fa allusiu d'entginas premissas ch'ei necessarias pil plascher e success ella clamada: «Mintgin sto esser promts da s'adattar al process da lavur ed alla societad.» El numna treis premissas necessarias ella professiun: Valurs, success e plascher. Deplorablamein mondien las valurs a piarder ella truscha dallas pusseivladads technicas modernas. Aviatadad e loa-

litad enviers il patrun e collaboratur muossien tonaton la qualitat d'ina persuna. Il success sappi vegnir influenzaus d'in e scadin. In dils facturs persunter seigi la confidenza. Success festiveschien buca sesezs. Da gronda impurtonza seigi il plascher ella lavur. El seigi ina habilitad vesevla, in bul irremplazzabel.

## Absolventas ed absolvents

### Scola professiunala commerciala (commerci en detagl):

El rang: *Flavia Tiri*, Trun (Maggi, Glion) 5,4. *Laura Cajochoen*, Ruschein (Zinsli, Glion), *Lorenz Caviezel*, Rueun (Denner, Laax), *Chiara F. Degonda*, Sedrun (Marcel Schmid GmbH, Sedrun), *Mesa Delic*, Glion (Posta, Glion), *Taulant Dervishi*, Cuera, *Patricia Giger*, Mustér (Menzi Sport, Glion), *Cornelia Maisen*, Zignau (Vögele, Glion), *Fabian Monn*, Mustér (Menzi Sport, Glion), *Mischa Schlatter*, Luven (Zinsli, Glion), *Flavio Tuor*, Trun (Sport Beat, Flem), *Armanda Widrig*, Eginas (Coop, Glion).

### Scola professiunala commerciala, scolaziun extendida (profil E):

*Joana Bastos*, Falera (Josef Brunner, Glion), *Nora Beeli*, Sagogn (Aldo Beeli, Glion), *Bianca Bleuler*, Ruschein (Treuhand-Kanzlei, Glion), *Sven Brasser*, Sursaisa (Bianchi Bau SA, Sursaisa), *Sebastian Floreano*, Dürnten (Hotel Adula, Flem), *Patricia Janka*, Sursaisa (Repower, Glion), *Bianca Livers*, Mustér (Coray Capaul, Mustér), *Pierina A. Maissen*, Schluein (Cathomas e Cabernard, Glion), *Sandro Orlik*, Sumvitg (Tarcisi Maissen SA, Trun), *Laura Panier*, Sagogn (Cathomas fiduziari, Glion), *Annatina Petschen*, Mustér (Administraziun communal, Sedrun), *Andrea F. Schlosser*, Glion (UBS, Glion), *Dania Sgier*, Schluein (Canzlia communal, Schluein), *Leandro Zamuner*, Breil (Salabim, Cuera).

### Scola professiunala commerciala, scolaziun cun maturitad professiunala (profil M):

El rang: *Daria Flury*, Breil (RTR, Cuera) 5,3; *Tobias Schär*, Rueun (Administraziun communal, Glion) 5,3. *Jasmin Blumenthal*, Castrisch (Spital regional Surselva, Glion), *Flavio Caduff*, Cumbel (Administraziun communal, Vella), *Rino Caduff*, Morissen (Administraziun communal, Mustér), *Ivan Derungs*, Castrisch (Administraziun communal, Trun), *Angela Nay*, Vella (Banca Raiffeisen Surselva, Glion).

### Scola media mercantila: E

El rang: *Chiara Janka*, Sursaisa, 5,3. *Dario Buchli*, Versomi, *Dragos Moga*, Schluein.

### Scola media propedeutica:

El rang: *Selina Meuli*, Arezen, 5,3. *Ramona Broger*, S. Martin, *Marlis Della Valle*, Trun, *Leonie Demont*, Vella, *Simona Tettamanti*, Landquart.

### Maturitad professiunala dalla scola media mercantila (HMS3+1):

El rang: *Anja Furger*, Cumbel (Departament federal per fatgs digl'exteriur, Berna), 5,7. *Gianfranco Soller*, Vella (Banca Cantunala Grischuna, Cuera), 5,3. *Julia Beer*, Mustér (Alpqi, Landquart), *Sabrina Cabalzar*, Lumbrein (Wüth, Cuera), *Carlo Gautschi*, Trun (Axa-Winterthur, Cuera), *Rosa Hunger*, Vuorz (Residenza da seniors Bodmer, Cuera), *Andri Nay*, Zignau (Berther Bau und Industrie, Mustér), *Marianna Specha*, Vella (Uffeci da stumadira Tusaun-Tumliasca, Tusaun), *Orlando Wolf*, Trun (Nervenschoner Informatik, Mustér).

### Maturitad professiunala dalla scola media mercantila (HMS+):

*Jasmin Bernhardsgrütter*, Glion (Stellenprofil Assistentz KBB, Teater Cuera, Cuera), *Désirée Albin*, Vella (Banca Cantunala Grischuna, Cuera).

### Maturitad specialisada sanadad:

El rang: *Marlen Herger*, Sumvitg (Kann UK kochen? Casa Depuz Trun), 5,4.

# Lavurs da baghegiar han entschiet

La ImmoTrun SA eregia a Trun ina nova mezca e scufflescha aschia plazs da lavur

DA HANS HUONDER / ANR

■ **Il venderdis suentermezdi ei l'emprema badelada per il niev baghetg per la mezca a Trun succedida. La ImmoTrun SA investescha dus milliuns francs el menaschi. Igl edificiu cun ina mezca ed ina mazlaria moderna vegn erigiu el territori d'industria da Cluis. Il baghetg ch'ei vegniu iniziav dil mazler indigen *Ivo Nay* ei vegniu planisau dad *Aldo Kollegger* dil biro d'architettura Toscano e *Kollegger* da Tusaun. Quel ha era planisau la nova mezca pil Grischun central a Cazas. Il baghetg a Trun eregia la ImmoTrun SA ed affitescha silsuenter quel ad *Ivo Nay*. Il menaschi duei porscher plirs plazs da lavur e garantir ina plivalur a persunas e menaschis cun vendita directa. Il baghetg cun per part duas alzas ha ina grondezia da 27 sin 15 meters. Leutier vegn in baghetg per la furniziun dils animals.**

## In menaschi modern

Dapi 2007 meina *Ivo Nay* a Zignau ina mezca. Il menaschi corrispunda denton buca pli allas normas. Medemamein eis el memia pigns per la lavur ch'ei carschida el decuors dils davos onns. «Las pretensius dil cantun e dalla confederaziun allas mezcas e mazlarias ein fetg aultas. Per biars menaschis pigns ein investiziuns strusch supportablas», di igl architè *Aldo Kollegger*. Per quei motiv ha *Ivo Nay* ch'ei da professiun pur e mazler tschercau ina

nova soluziun. El baghetg niev a Trun vesa el ina schanza da reducir igl andament dallas lavurs e da saver mazzar per prezis conforms alla fiera. «Nus realisein quella infrastruttura per in mazler giuven e motivau. Ad el lein nus porscher la pusseivladad da far vinavon fatschenta ella re-

giun ed aschia da saver porscher plazs da lavur era egl avegnir. Medemamein essan nus perschuidi che auters mazlers vegnan a far diever da quella purschida topmoderna. Ils mazlers san numnadamein laschar mazzar ils animals tier *Ivo Nay* e silsuenter elavurar la carn tenor giavisch en

lur menaschis», di *Edgar Durschei*, president dil cussegl d'administraziun dalla ImmoTrun SA. Il survetsch dad *Ivo Nay* duei denton buca star a disposiziun sulertamein als mazlers, mobein era a purs, catschadurs ed autras persunas. Cun l'elecziun da Trun hagian ins tscharniu

sappientivamein in liug central en Surselva. «Nus lein empruar da tener ils transports dils animals aschi cuorts sco pusseivel», puntuescha *Edgar Durschei*.

## Preparativas duront dus onns

Sco quei ch'ils iniziants ed investurs han declarau il venderdis cun occasiun dall'empema badelada a Trun han las preparativas pil project cuzzau pressapauc dus onns. Il baghetg vegn finanziaus spirtamein da privats. Acziunaris ein *Edgar Durschei*, *Vitus Nay* ed *Ivo Nay*. Sustegn obtegn il project era da *Peter Binz*. Las lavurs da baghegiar cuozan entochen il december. Naven dil schaner duei il menaschi esser en funcziun. Il terren ha la societad obteniu dalla vischnaunca da Trun en dretg da baghegiar. Egl avegnir duei vegnir mazzau cheu rodund 750 animals per onn. Quei diember taxeschan ils iniziants per realistics. Ultra dalla lavur che vegn prestada en favur dils menaschis dalla regiun duein era ils contacts cun clientella ella Bassa vegnir promovì. Ina collaboraziun pli stretga cun il menaschi da mezca e mazlaria a Rueun ei bein vegniu ponderaus. «Ella ei denton mai stada ina opziun concreta», di *Edgar Durschei*. Per *Vitus Nay* duei il menaschi a Trun buca esser ina concurrenza per quel a Rueun, mobein in'alternativa: «Secapescha ch'ils prezis giogan era ina rolla. Era quels dils transports ein pli aults sch'ins sto serender cun ils animals naven da sisum la Surselva entochen a Rueun.»



Investurs e planisader cun occasiun dall'emprema badelada. Da sen. *Vitus Nay*, *Edgar Durschei*, *Ivo Nay* ed *Aldo Kollegger*.

FOTO H. HUONDER